

# 1914-Préf. Glòri óublidado - Albert Boudon-Lashermes (1882-1967) du Puy en Velay

## Prefaci

Es toujour pèr miracle que se fan li resurreciooun. Aquele de nosto lengo, en plen siècle dè-s-e-nouven, countùnio, au siècle vinten, d'esmeraviha lou mounde.

Veici que lou Velai, qu'avié, au tèms passa, fourni au Gai Sabé tant de cantaire mèstre, mai que, pèr lis estras e tressimàci de l'istòri avié à la longo, óublida lou trelus de si troubaire ilustre, veici que lou Velai, pèr lou miracle de l'Estello, de nosto Santo-Estello, lusour dóu Felibrige, se reviho de soun som, se remèmbro sa lengo (qu'acò 's la lengo d'O) e nous erido pèr la voues de si felibre mantènèire.

Emai iéu siéu dóu Miejour! Emai iéu vous coumprene, o fraire de Prouvènço! Emai iéu vole pas renega ma vièlo glòri e óublida la Court d'amour dóu Puei, l'esplendour de noste Puei, de noste Puei-Santo-Mariò, ounte se guierdounavo li canta prouvençau emé la requisto joio de l'Esparvié dóu Velai!

E, au pèd de la Roco Courounello dóu Puei e i pèd de Santo Mariò, que i'es vuei entrounado souto lou noble titre de Nosto-Damo de Franço, veici qu'a sourgenta l'Escolo felibrenco de Pèire Cardinau!

E lou cabiscòu de l'Escolo, lou baile velaien, mèste Boudoun Las-Hermes, vuei nous regalo d'un recuei de pouësìo epico, li *Glòri óublidado* que, talamen es linde, éu nous sèmbla espeli en ribo de Vau-Cluso!

Dins aquele sinfòni d'auturous cantadis counsacra i grand fa em' i gràndi figuro de l'istòri velaienco, nous fai gau de saluda li sant que nous civilisèron, li prince emé li rèi qu'an fa noste parage e pièi (toustèms fugon lausa!) li celebri troubaire qu'an fa valé la lengo.

E longo-mai ansin! e zóu à la bono ouro! se voulèn pas que lou Miejour, despersouna, desparaula, devengue, ai-las! un cors sènsò amo!

Maiano, 7 de mars 1914

F. Mistral

*NDLR - Es la darriero prefaci escricho pèr Mistral.*

© CIEL d'Oc – Juliet 2009